

# 菩薩摩訶薩到彼岸當學般若波羅蜜

## 般若波羅蜜

「大智度論」集粹之三十二

智  
銘

佛言：「菩薩摩訶薩欲到有爲、無爲法彼岸，當學般若波羅蜜。」彼岸者，於有爲、無爲法，盡到其邊。云何是彼岸？以大智慧悉知、悉盡有爲法總相、別相種種悉解；無爲法中，從須陀洹至佛，悉皆了知。是爲到彼岸。

佛言：「菩薩摩訶薩，欲知過去、現在、未來諸法如、諸法法相，無生際者，當學般若波羅蜜。」諸法如者，是畧說，今言三世如者，是廣說。法相即是法性；無生際即是實際。過去法如，即是過去法相；未來、現在亦如是。過去法如，即是未來、現在法如；現在法如，即是過去、未來法如；未來法如，即是過去、現在法如。所以者何？如相非一、非異故。如先說之二種如：一者、世間如；二者、出世間如。用是世間如，三世各各異；用是出世間如，三世爲一。

又法相名諸法業，諸法所作力，因緣、果報。如火爲熱相，水爲濕相；如是諸法中分別因緣、果報，各各別相，如是處非處力中說，是名世間法相。若是諸法相推求導究，入無生法中，更無過是者，是名無生際。

一切法皆無生，三世一相，所謂無相，如是則無生相，無生名爲涅槃，以涅槃不生不濕故。涅槃者，末後究竟，不復更生，而一切法即是涅槃；以是故，佛說一切法皆是無生際。

佛言：「菩薩摩訶薩，欲在一切聲聞、辟支佛前，欲給侍諸佛；欲爲諸佛內眷屬，欲得大眷屬；欲得菩薩眷屬；欲得淨報大施，當學般若波羅蜜。」菩薩漏未盡，而聲聞、辟支佛漏已盡，云何得在其前？蓋菩薩初發意時，已在一切衆生前？何況積劫修行？是菩薩功德智慧大故，世世常大，能利益聲聞、辟支佛。衆生知菩薩恩故，推崇敬重。若出家，值有佛法則爲世作大度師，興顯佛法；若無佛法，則爲外道大師，行四無量。羅漢、辟支佛，雖有無漏，利益事少，菩薩雖有漏智慧，及其成熟，利益無量。而羅漢、辟支佛四事供養助道之具，多由菩薩得。如首楞嚴經說：文殊師利七十二億作辟支佛，作辟支佛人，令其成道。以是故，在聲聞、辟支佛前。

欲爲諸佛給使（侍）者：如釋迦文佛未出家時，車匿給使。

出家六年苦行時，五人給使，得道時，彌喜、羅陀、須那利多羅、阿難、密蹟力士等，是名內眷屬。大眷屬者，舍利弗、目犍連、摩訶迦葉、須菩提、迦旃延、富樓那、阿泥盧豆等諸聖人，及彌勒、文殊師利、跋陀婆羅諸阿毗跋致一生補處菩薩等，是名大眷屬。

佛有二種身：一者、法性生身；二者、隨世間身。世間身眷屬，如瞿毗耶、耶輸陀等諸綵女是。法性生身者，有無量無數阿僧祇一生補處菩薩侍從。所以者何？如不可思議解脫經說：佛欲生時，八萬四千一生補處菩薩在前導，菩薩從後而生；又如法華經說：從地湧出菩薩等，皆是內眷屬、大眷屬。菩薩眷屬者，有佛，純以菩薩爲眷屬；有佛，純以聲聞爲眷屬；有佛，菩薩、聲聞雜爲眷屬，是故言，但欲得菩薩爲眷屬者，當學般若波羅蜜。

淨報大施者，有人言：菩薩多集福德，未除煩惱，受人信施，未能淨報。佛言：菩薩行般若波羅蜜，諸法皆空不可得，何況諸結使？菩薩入法性中故，不證實際，是故能淨報施福。復次，菩薩功德廣大，從發心已來，欲代一衆生受一切苦，欲以一切功德與一切衆生，然後當自求佛道。但是事不可得故，而自成佛，度一切衆生。又菩薩志願，不以阿僧祇爲拘；如世間如及法性、實際、虛空等久住。菩薩心住世間，利益衆生故，亦如是久住，無有窮已。是人不能淨報施福者，誰能淨畢！如父母雖有結使諸惡，以一世利益子故，受其供養，令得大福，何況菩薩無諸結使，而住無邊世中利益衆生，而不淨畢？又菩薩但有悲心而無般若，當能利益，何況行般若波羅蜜！所謂菩薩無結使而又世間受生者，是菩薩得無生法忍，得法性生身，處處變化以度衆生，莊嚴世界。是功德因緣故，雖未得佛，能淨報施福。

佛言：「菩薩摩訶薩欲不起慳心、破戒心、瞋恚心、懈怠心、亂心、癡心，當學般若波羅蜜。」是六種心惡故，能障蔽六波羅蜜門。如菩薩行布施時，若有慳心起，令施不清淨，所謂不能以好物施；若與好物，不能多與；若與外物，則不能內施；若能內施，不能盡與，皆由慳心故。菩薩行般若波羅蜜，知一切法無

我、無我所，諸法皆空，如夢如幻，以身、頭目、骨髓布施，如施草木。是菩薩雖未得道，欲常不起是慳心，當學般若波羅蜜。

諸餘人離欲得道故，不生破戒心，菩薩行般若波羅蜜故，不見破戒事。所以者何？戒爲一切諸善功德住處，譬如地爲一切萬物所依止處。破戒當不得餘道，何況阿耨多羅三藐三菩提！以是故，不生破戒心。菩薩法者，安樂衆生，若破戒者，惱亂一切。以是故，菩薩不生破戒心，何況破戒？

小乘及諸凡夫，當不應生瞋恚心，何況菩薩發阿耨多羅三藐三菩提意！身爲苦器，法自受惱，譬如犯罪之人，自致刑戮，自作自受，不應怨人，但當自護其心，不令起惡，譬如人遭風雨寒熱，亦無所瞋。作是念：菩薩求佛，以大悲爲本，若懷瞋恚，則喪志願，瞋恚之人，當不得世間樂，何況道樂？瞋恚之人，自不得樂，何能以樂與人！懈怠之人，世間勝事當不能成，何況阿耨多羅三藐三菩提！散亂之心，如風中燈，雖有光明，不能照物。亂心中智慧，亦復如是。智慧是一切善法根本，若欲成就，是智，先當攝心，就後可成。散亂之心，世間好事，當不能善知，何況出世間法，愚癡人心，一切成敗事，皆不能及，何況微妙深義！

無智慧眠，故受著邪法，不受正見。如是之人，世間近事，尚不能成，何況阿耨多羅三藐三菩提！菩薩行般若波羅蜜力故，能障是六蔽，淨六波羅蜜，以是故說，若欲不起六蔽，當學般若波羅蜜。

佛言：「菩薩摩訶薩欲使一切衆生，立於布施福處、持戒福處、修定福處、勸導福處；欲令衆生立於財福、法福處，當學般若波羅蜜。」所謂福處者，阿毗曇言：福者，善有漏身、口、意業。有人言：不隱沒無記是。所以者何？善有漏業因緣果報故，得是不隱沒無記，福是果報，亦各爲福。是福畧說有三種：布施、持戒、修定。

何等是布施？有人以衣服、臥具、飲食、華香、瓔珞等與人，是名布施。飲食等物非布施，以飲食等物與時，心中生法名捨

，與慳心相違，是名布施福德。或是有漏，或是無漏，常是善心數法。心相應、隨心行，共心生，無色無形，能作緣，業相應，隨業行，業共生，非先業果報，得修、行修、慧證、身證，凡夫人得，亦聖人得。有人言：是捨法相應思，是名布施福德。所以者何？業能生果報故。思即是業，身、口不名為業，從思生，故得名業。此布施有二種：一者、淨；二者、不淨。不淨者，直施而已；或畏失財故與，或惡訶罵故與，或無用故與、或親愛故與、或為求勢故與，以施故多致勢援；或死急故與、或求善譽故與、或求與貴勝齊名故與、或妬嫉故與、或惱慢故與，小人愚賤尙施，我為貴重大人，云何不與；或為咒願福德故與，或求去除凶故與，或求入伴黨故與、或不一心、不恭敬、輕賤受者而與。如是種種因緣，為今世事故施，與淨相違，名為不淨。淨施者，如經中說：治心故施，莊嚴意故施、為得第一利故施，生清淨心，能分別為助涅槃故施。如說諸天不淨心布施者，宮殿光明薄少；若淨心布施者，宮殿光明增廣。此希施業，雖過去乃至千萬世中不失。

布施應時，得福增長，如經說：饑餓時施，得福增多，或遠行來時，若曠路險道中施，若常施不斷，或時常念施，故施得增廣；若大施得福多，若施好人，若施佛，若施者、受者清淨故，若決定心施，若自以力致財施，若隨所有多少能盡施，若交以物施，若以園田使人等施。如是布施，唯有菩薩能以深心行之。

持戒福處者，佛說五戒福者是。知是眾生故奪命，得殺罪，止不作，是初戒善相。或有人言：謂是不隱沒無記，或欲界繫，或不繫，是非心、非心數法，非心相應，非隨心行，或共心生，或不共心生，非業相應，非隨業行，或共業生，或不共業生。非思業果報，得修，行修，身證，慧證，或思惟斷，或不斷，離欲界，欲時得斷知，凡夫人聖人共有。是名說不殺生戒相；餘戒亦如是隨義分別。

修定福處者，雖經中說修慈是修定福，亦說有漏禪定能生果報者，總名修定福。以欲界多瞋多亂故，先說慈心為修定福。得慈方便，願與眾生樂，後實見受樂，是心相應法，名為慈法。是

法或色界繫，或不繫，是為真慈；是方便慈，欲界繫。常隨心行，隨心生，無形無對，能緣法，非業、業相應，而隨業行，共業生，非先業果報，得修、行修、身證、慧證，或思惟斷，或不斷，離色界欲時得斷知。有覺有觀，亦無覺無觀，亦無覺有觀。或有喜、或無喜，或有息、或無息，亦凡夫人，亦聖人。或樂受相應，或不苦不樂受相應。先緣得能相，後緣實義。根本四禪中，亦過四禪；依止四禪得者，牢固有力。慈悲言親愛，喜怨無諍故，名為親愛。能緣無量眾生故，名為無量。能利益眾生，能離欲故，名為梵行。四無量中，慈心能生大福德，悲心憂愁故，捨福德；喜心自念功德故，福德不深；捨心捨捨，故福亦少。佛說慈心有五利：何等五？一者，刀不傷；二者，毒不害；三者，火不燒；四者，水不沒；五者，於一切瞋怒惡害眾生中，見皆歡喜。悲心等事不爾，以是故說修定福為慈，餘者隨從，及諸能生果報有漏定。

勸福處者，若比丘不能坐禪，不能誦經，教化勸導修立德；或有比丘能坐禪、誦經，見諸比丘衣食之少，力能所致，亦行勸導。及諸菩薩憐愍眾生故，以福德因緣勸化之，又出家人，應自求財，於戒有失，是故勸導以為因緣。

財福者，衣服、飲食、臥具、醫藥、金銀、車馬、田宅等。布施福與財福有異，布施者，總攝一切施：財施、法施、俗施、道施；今欲分別法施、財施。法施者，如佛以大慈故，初轉法輪，無量眾生得道；後舍利弗逐佛轉法輪；餘諸聖人，雖非轉法輪，亦為眾生說法得道，亦名法施。復有徧當菩薩、觀世音、大勢、文殊師利、彌勒菩薩等，以二種神通力：果報神通、修得神通，住是中，以福德、方便力，光明、神足等，種種因緣開度眾生，亦名法施。又佛弟子未得聖道者，坐禪、誦經，不壞諸法相，教化弟子，皆名法施。如是等種種，名法施相。以是故說：菩薩欲立眾生六種施福者，當學般若波羅蜜。

佛言：「菩薩摩訶薩欲得五眼者，當學般若波羅蜜。」所謂五眼；是肉眼、天眼、慧眼、法眼、佛眼。肉眼見近不見遠，見前不見後，見外不見內，見晝不見夜，見上不見下。以此礙故，

求天眼。得是天眼，遠近皆見，前後、內外、晝夜、上下悉皆無礙。是天眼見和合因緣生假名之物，不見實相，所謂空、無相、無作，無生、無滅，如前中後亦爾；爲實相故，求慧眼。得慧眼，不見衆生，盡滅一異相，捨離諸著，不受一切法，智慧自內滅，是名慧眼。但慧眼不能度衆生，所以者何？無所分別故，以是故生法眼。法眼令是人行是法，得是道，知一切衆生各各方便門，令得道證，法眼不能遍知度衆生方便道，以是故求佛眼，佛眼無所不知，覆障雖密，無不見知，於餘人極遠於佛至近；於餘幽闇，於佛顯明，於餘爲疑，於佛決定；於餘微細，於佛爲粗，於餘甚深於佛甚淺；是佛眼，無事不聞，無事不見，無事不知，無事爲難，無所思惟，一切法中，佛眼常照。故菩薩欲得五眼，當學般若波羅蜜。

佛言：「菩薩摩訶薩欲以天眼見十方如恆河沙等世界中諸佛，欲以天耳聞十方諸佛所說法，欲著諸佛心，當學般若波羅蜜。」  
「天眼法所見，不過三千大千世界；今以般若波羅蜜力，故見十方恆河沙等諸國中諸佛。所以者何？般若波羅蜜中，無近無遠，無所礙故。般舟三昧經說：以般舟三昧力故，雖未得天眼，而能見十方現在諸佛、般舟三昧，離欲人、未離欲人俱得，天眼但離欲人得。般舟三昧，憶想分別，常修常習故見；天眼修神道，得色界四大造色眼，四邊得徧明相，是爲差別。天眼功易，譬如日出，見色不難；三昧功難，如夜然燈，見色不易。天耳亦如是。」

知諸佛心者，佛以神力故令菩薩知，如經說：一切衆生無知佛心者，若佛以神力令知，乃至昆蟲亦能知；以是故知，佛以神力故，令菩薩知佛心。復次，般若波羅蜜無礙相，粗細、深淺、愚聖，都無差別。諸佛心如，菩薩心如，一如無異；菩薩隨是如故，能知諸佛心。希有難事，不應知而知，以是故言：欲得是者，當學般若波羅蜜。

佛言：「（菩薩摩訶薩）欲聞十方諸佛所說法，聞已乃至阿耨多羅三藐三菩提不忘，當學般若波羅蜜。」菩薩以聞持陀羅尼力故能受，堅憶念陀羅尼力故能不忘。以般若波羅蜜力，畢竟清

淨無所著；菩薩從十方諸佛所聞法，以般若波羅蜜器大故，能受無量法，持而不忘。是般若波羅蜜，不可譬喻如虛空，如劫燒盡已，大雨彌滿，是雨除虛空，更無處能受。十方諸佛說法如雨，從佛口出，除行般若波羅蜜菩薩，更無能受者。以是言：欲聞十方諸佛說法，當學般若波羅蜜。

佛言：「菩薩摩訶薩欲見過去、未來諸佛世界，及見現在十方諸佛世界，當學般若波羅蜜。」菩薩未深入禪定，若見十方世界山河、草木，心則散亂，故但觀諸佛。禪定力未深時，不觀土地、山河、樹木。得禪定力已，隨意廣觀。復次，清淨佛國難見，故言欲見諸佛國，當學般若波羅蜜。又一佛有無量百千種世界，有嚴淨，有不嚴淨、有雜，有畢竟清淨世界雜見故，以般若波羅蜜力，乃能得見。且菩薩有見過去、未來三昧，入是三昧已，見過去、未來事，如夢中所見。復次，菩薩有不滅除三昧，入是三昧已，不見諸佛有滅者，此二法是智慧，假名爲眼，如轉法輪中，於四諦得眼、智、明、覺。

菩薩見十方現在佛世界，定知過去、未來諸佛世界亦爾。所以者何？一切諸佛功德同故。復次，般若波羅蜜中，如現在、過去、未來，等無異，一如、一法性故。以是故，菩薩具般若波羅蜜，能見諸佛世界。

佛言：「菩薩摩訶薩欲聞十方諸佛所說十二部經：修多羅、祇夜、受記經、伽陀、優陀那。因緣經、阿波陀那，如是語經、本生經、廣經、未曾有經、論議經，諸聲聞等聞與不聞，盡欲誦受持，當學般若波羅蜜。」先說盡欲聞十方諸佛所說法者，當學般若波羅蜜。所說法者，即此十二部經。諸經中直說者，名修多羅，所謂四阿含，諸摩訶衍經，及二百五十戒經；出三藏外亦有諸經，皆名修多羅。

諸經中偈名祇夜。衆生九道中受記，所謂三乘道、六趣道。此人經爾所阿僧祇劫，當作佛，若記爾所歲當作佛；記聲聞人今世、後世得道；記辟支佛人但後世得道，記餘六道，亦皆受後世報。諸佛法，欲與衆生受記，先皆微笑，無量種光，從四牙中出。從上二牙出者，光照三惡道，從其光明演無量法，說一切作法

無常，一切法無我，安隱涅槃；象生得遇斯光，聞說法者，身心安樂，得生人中天上，從是因緣，皆得畢苦。從下二牙出者，上照人天，乃至有頂禪，若聾盲、瘡痍、狂病，皆得除愈；六欲天人及阿修羅受五欲樂，遇佛光明，聲說法聲，皆厭患欲樂，身心安隱；色界諸天受禪定樂時，輪佛光明，聞說法聲，亦生厭患，來詣佛所。此諸光明，復至十方，徧照六道，作佛事已，還遶佛身七匝。若記地獄，光從足下入；若記畜生，光從膺入；若記餓鬼，光從脛入；若記人道，光從臍入；若記天道，光從胸入；若記聲聞，光從口入；若記辟支佛，光從眉間相入；若記得佛，光從頂入。若欲受記，先現此相。然後阿難等諸弟子發問。一切偈名祇夜，六句、三句、五句，句多少不定，亦名祇夜，亦名伽陀。

優陀那者，名有法，佛必應說而無有問者，佛畧開問端。如佛在舍婆提，毗舍佉堂上，陰地經行，自說優陀那，所謂無我、無我所，是事善哉！爾時，一比丘合掌白佛言：世尊！云何無我、無我所？是事善哉！佛告比丘：凡夫人未得無漏道，顛倒覆心故，於無我、無我所，心大驚怖。若佛及佛弟子聞如法者，歡喜奉行，無顛倒故，不復更作。如是等，雜阿含中廣說。又如般若波羅蜜品中，諸天子讚須菩提所說：善哉！善哉！希有世尊！難有世尊！是名優陀那。又如佛涅槃後，諸弟子抄集要偈，諸無常偈等作無常品，乃至婆羅門偈等作婆羅門品，亦名優陀那。諸有集衆妙事，皆名優陀那。如是等名優陀那經相。

尼陀那者，說諸佛法本起因緣，佛何因緣說此事；修多羅中，有人問故。爲說具事；毗尼中，有人犯是事，故結是戒。一切佛語緣起事，皆名尼陀那。

阿波陀那者，與世間相似柔軟淺語；如中阿含中長阿波陀那經，長阿含中大阿波陀那，毗尼中億爾阿波陀那，二十億阿波陀那，解二百五十戒經中欲阿波陀那一部，菩薩阿波陀那一部，如是等無量阿波陀那。

如是語經者，有二種：一者、法句，言我先許說者，今已說竟。二者、三藏摩訶衍外，更有經名一相多迦；有人言目多迦。

目多迦名出三藏及摩訶衍。何等是？如佛說淨飯王強令出家作佛弟子者，佛選擇五百人堪任得道者，收至舍婆提；所以者何？以其未離欲，若近親里，恐其破戒故，常至舍婆提。令舍利弗、目犍連等教化之，初夜、後夜，專精不睡，勤修精進，故得道；得道已，佛還將之本生國。一切諸佛法，還本國時，與大會諸天象俱住迦毗羅婆仙人林中。此林去迦毗羅婆城五十里，是諸釋遊戲園。此諸釋子比丘，處舍婆提時，初夜、後夜，專精不睡，故以夜爲長；從林中來，入城乞食，覺道里長遠。爾時佛知其心，有一師子來禮佛足，在一面住，佛以是三因緣，故說偈：

不寐夜長

疲倦道長

愚生死長

莫知正法

佛告比丘：汝未出家時，其心放逸多睡眠故，不覺夜長，今初夜，後夜，專精求道，減省睡眠故，覺夜長。此迦毗羅婆林，汝本駕乘遊戲，不覺爲遠，今著衣持鉢，步行疲極，故覺道長。是師子，鞞婆尸佛時，作婆羅門師，見佛說法，來至佛所。爾時，大眾以聽法故，無共語者，卽生惡念，發惡罵言：此諸禿輩，與畜生何異，不別好人，不知言語，以是惡口業故，從鞞婆尸佛乃至今日，九十一劫，常墮畜生中；此人爾時卽應得道，以愚癡故，自作生死長久；今於佛所心清淨故，當得解脫。如是等經，名爲出世因緣。於何處出？於三藏、摩訶衍中出，故名爲出。何名因緣，是三事之本，名爲因緣經。

本生經者，昔日菩薩曾爲師子，在林中住，與一獼猴共爲親友，獼猴以二子寄於師子，時有鷲鳥，饑行求食，值師子睡，故取猴子而去，住於樹上，師子覺已，求猴子不得，見鷲持在樹上，而告鷲言：我受獼猴寄託二子，護之不謹，令汝得去，孤負言信，請從汝索；我爲獸中之王，汝爲鳥中之主，貴勢同等，宜以相還，鷲言：汝不知時，吾今饑乏，何論同異？師子知其叵得，自以利爪剗其脇肉，以買猴子。又過去世時，人民多病黃白瘰癧，菩薩爾時，身爲赤魚，自以其肉施諸病人，以救其疾。又昔菩薩作一鳥身，在林中住，見有一人入於深水非人行處，爲水神所冒。水神冒法，著不可解；鳥知解法，至香山中取一藥草，著其冒上，繩卽爛壞，人得脫去。如是等無量本生，多有所濟，是名

本生經。

廣經者，名摩訶衍。所謂般若波羅蜜經、六波羅蜜經、華嚴經、法華經、佛本起因緣經、雲經、法雲經、大雲經、如是等無量阿僧祇諸經，爲得阿耨多羅三藐三菩提故說。

鞞佛畧，秦言未曾有經，如佛現種種神力，衆生怪未曾有；所謂佛生時，身放大光明，照三千大千世界及幽闇之處；復照十方無量諸佛三千大千世界。是時於佛母前，有清淨好池，以浴菩薩，梵王執蓋，帝釋洗身，二龍吐水。又生時，不須扶持而行七步，足蹟之處，皆有蓮華，而發是言：我是度一切衆生老、病、死者！地大震動，天雨衆華，樹出音聲，作天使樂。如是等無量希有事，是名未曾有經。

論義經者，答諸問者，釋其所以，又復廣說諸義，如佛說四諦，何等是四？所謂苦、集、滅、道聖諦，是名論議。何等爲苦聖諦？所謂生苦等八種苦。何等是生苦？所謂諸衆生各各生處，是中受苦。如是等問答，廣解其義，是名優婆提舍。如摩訶衍中，佛說六波羅蜜，何等六？所謂檀波羅蜜，乃至般若波羅蜜。何等是檀波羅蜜？檀波羅蜜有二種：一者、具足；二者、不具足。何等具足？與般若波羅蜜和合，乃至十住菩薩所得，是名具足。不具足者，初發菩薩心，未得無生忍法，未與般若波羅蜜合，是名不具足。乃至禪波羅蜜亦如是。般若波羅蜜具足者，有大力方便；未具足者，無方便力。復次，佛所說論議經，及摩訶迦旃延所解修多羅，乃至像法凡夫人如法說者，亦名優婆提舍。

聲聞所不聞者，佛獨與菩薩說法，無諸聲聞聽者。又佛以神通力，變身無數，徧至十方一乘世界說法。又復，佛爲欲天、色天說法，無諸弟子，故不得聞。佛爲諸大菩薩說不可思議解脫經，舍利弗、目連在佛左右而不得聞，以不種是聞大乘行法因緣故。譬如坐禪人，入一切處定中，能使一切皆水皆火，而餘人不見。

盡欲受誦持者，聞而奉行爲受，久久不失爲持。

菩薩摩訶薩欲到彼岸，乃至盡欲受誦持者，當學般若波羅蜜。

(完)

(上接第43頁「虛雲和尚」)

德清知此人無可理喻，淡淡笑道：「縱然無神無佛，却有因果循環，善有善報，惡有惡報，種瓜得瓜，種豆得豆，施主不可不信！」

狂生哈哈狂笑道：「和尚你這些話，只可同那無知婦孺去講！同我講是無用的！什麼因果報應那一套，道婆姑子也會講，有何希奇？何須你來賣弄？」

德清道：「佛理在於真實，不在於炫奇！因果律雖是簡單淺白，却是真理。若人人信佛信因果，世界就平靜安定得多。」

狂生狂笑：「因果因果！都是鬼話！我來教你吧！殺人放火金腰帶，修橋補路無人埋，這才是人世的真因果！和尚你們都說善有善報，惡有惡報，世上那麼多惡人壞人，殺人放火，却不見他報應了？」

德清道：「眼前未報應，來生報應多！殺人爲惡，生生世世報應輪迴不完！」

狂生道：「他生未卜今生休！和尚，你們信佛都是愚蠢！人一死就一了百了，那有什麼來生呀？我不信！我就不信這些邪！你立刻拿個來生給我看看，你立刻叫個神佛出現給我看看，我方信服，拿不出來吧？哈哈！和尚，你拜佛不如拜我罷！」又狂喊：「我就不信神佛，你叫神佛立即出現殺了我罷！」就來踢翻清德的香案。

德清道：「佛是濟苦度厄的，佛心慈悲，不會因你不信佛就降禍給你的！」

那狂生還要瞎鬧，週圍的遊人却動了公憤，衆人都罵他，攆他。也有人喊揍他，都說這狂生太猖狂了，衆人齊聲喊打，嚇得那狂生抱頭鼠竄。德清攔住衆人，說道：「列位且勿跟他一般見識，由得他去！」

衆人道：「和尚果然有修養。這種狂生，真是太狂了！」

德清笑道：「他現今着了空魔，將來少不得會覺悟前非，歸依佛前。」

「這種人也會悔改嗎？」

(未完)